

Dia Internacional di Museo dedica na museo y paisahe cultural

Na Aruba cada dia tin mas interes pa bishita nos museonan

MUNDO henter a celebra Dia Internacional di Museo ayera, reflexionando e aña aki riba e tema “Museonan y paisahenan cultural”. Aña pasa mas di 35.000 museo den 145 pais a celebra e fecha aki, cu e obhetivo pa conscientisa comunidadnan cu museonan ta importante pa intercambio cultural, pa enriquece di culturanan y desaroyo di comprension mutuo, cooperacion y paz entre hendenan.

A cuminsa cu e celebracion aki, esta Dia Internacional di Museo, desde aña 1977, pues 39 aña pasa. Cu e tema di e aña aki ta enfoca riba unda nos ta biba, cu ta rondona nos cu imagen y simbolonan cu ta identifica y caracteriza nos pais.

Di acuerdo cu e vision aki, e paisahenan ta considera como e contexto, geografica-, historica-, economica-, social- y culturalmente, den cual museonan ta existi y opera.

E iniciativa aki a resulta masha exitoso y ta dunando su frutonan rond mundo.

“Bishitantenan di museo mester siña tocante nos pasado y disfruta e diversidad y culturanan”, asina Anky Vrolijk, Director di Fundacion Museo Arubano a duna di conoce.

“Aki na Aruba tambe nos ta notando mas interes den nos museonan y nan coleccion y exposicionnan. Hende ta mas pendiente di nos pasado pa por compronde nos presente mihor y eventualmente ta prepara pa un mihor futuro”.

Aki na Aruba, Museo Arkeologico lo ofrece diadomingo awor di 12:00pm pa 1:00pm e presentacion tocante e santananan historico na Santa Cruz 35.

Bishita Museo Arkeologico entre 10:00am pa 2:00pm y haci uzo di e oportunidad pa presenciar e charla y haci tur bo preguntanan na e

arkeologo mes. Bishitantenan

cu participa na e presentacion por haya e publicacion nobo di Museo ‘In situ’ nr. 1, cu ta contene informacion di e resultado di investigacion preliminar di e sitio arkeologico Santa Cruz 35.

E publicacion aki ta e prome di e serie ‘In situ’ nobo aki y ta limita, pues ‘op is op’.

A funda Fundacion Museo Arubano na aña 1992, pero na 2015 a haci cambian structural pa pone 5 museo hunto bao di un organizacion. Ta trata aki di e Museo Historico (Fort Zoutman, Oranjestad), Museo Arkeologico (Ecure Complex, Oranjestad), Museo di Comunidad (Nicolas Store, San Nicolas), Museo Industrial (Watertoren, San Nicolas) y Museo di Carnaval (San Nicolas). Museo di Comunidad y Museo Industrial ta programa pa habri na aña 2016 y Museo di Carnaval lo habri na 2017.

E idea general ta pa trece museonan mas cerca di comunidad y ta trahando pa re-enforstar tur museo pa hisa e calidad y logra pa nan yega na e nivel di Museo Arkeologico, cual ta reconoci como un di e mihor museonan di Caribe.

E siguiente museo pa habri, den e prome mitar di aña 2016, ta Museo Industrial. Ta trahando caba riba plannan pa haci e museonan mas atractivo pa comunidad y subraya e importancia di historia y cultura.

Fundacion Museo Arubano tin su oficina principal situa na Zoutmanstraat # 1. E fundacion ta conta cu sosten financiero di varios instancia, e.o. di Aruba Ports Authority cu ta cobra cada pasahero riba crucero un “fee” special cu ta bay e.o. pa promove nos museonan.

